

Sonntag, 22. Januar 2012

üße Bobby...



Liebi Frou Muhmethaler u Team,  
ha grad hüt entdeckt das üse Bobby im Februar scho  
es Jahr bi üs isch. Wie schnäu doch die Zit vergange  
isch! Mir heis no nie beröit, üs füre Bobby entschide z  
ha! Mir hei mit ihm z grosse Los zoge, är isch soooo ä  
feine flotte junge Maa mit aune Flause wo jungi  
Manne i däm Auter eifach so hei ;) sit dämm Momänt  
wo der Bobby bi üs isch, wäit ä früsche Wind wo mit  
viu Liebi gmischt isch, dür üsi Familie! Sogar üse  
eutischt Sohn, wo gli 24.gi wird hett sech vo sire  
Liebi la erfasse, u hett ne fescht is Härz gschlosse.  
Da isch nümme viu vo coolem Getue, der Bobby wird  
gstrichlet u abgmüntschelet! :) Ja, u sit 3 Wuche  
isch üse letscht Suhn i ne egeti Wohnig zoge u i bi  
soooo froh u dankbar hei mir der Bobby, mit ihm geit  
z loslah vo mine Chinder viu besser aus ig mir je hätt  
chönne vorsteue! I ha gar nid richtig Zit zum truurig  
si, wüu doch no öpper da isch wo üs bruucht. Zum  
Glück! Dir gseht, ou we der Bobby no viu muess lehre,  
mir hei ne lieb, u mir gäbe ne freiwillig nümme häre!!!  
I versuech öich es paar Fotos z Maile, villedch geitz, i  
bi no nid so sattufescht i dämm aber i versueches!  
I wünsche öich witerhin viu Fröid u Erfoug mit öire  
wichtige Arbeit!  
Mit liebe Grüess,  
Anna Miniati



